



Komunikadu Imprensa

11 Dezembru 2013

JSMP lansa relatóriu kona-bá Lei Kontra Violénsia Doméstika: Tinan tolu iha implementasaun no nia obstakulu

Iha 12 Dezembru 2012, *Judicial System Monitoring Programme* (JSMP) sei lansa relatóriu temátiku ne'ebé produs ho titlu: Lei Kontra Violénsia Doméstika: Tinan tolu iha implementasaun no nia obstakulu.

Relatóriu ne'e ho objetivu atu reeve implementasaun LKVD iha Timor-Leste durante tinan tolu nia laran, partikularmente, iha relasaun ho akuzasaun, sentensa no ezekusaun sentensa iha kazu violénsia doméstika sira.

Relatóriu ne'e mai hosi JSMP nia dados sira hosi monitorizasaun iha tribunál hosi Julu 2010 to'o Juñu 2013, dados hosi Unidade ba Ema Vulneravel (Vulnerable Person's Unit-VPU) hosi Polísia Nasionál Timor-Leste, estudu kazu no entrevista ho autór judisiáriu sira.

Iha tinan tolu laran desde promulgasaun LKVD, JSMP monitoriza kazu violénsia doméstika hamutuk 352 iha tribunál distritál haat (Dili, Baucau, Suai no Oecusse) no deskobre katak maioria kazu violénsia doméstika (71% hosi kazu sira ne'ebé monitoriza hosi JSMP) ne'e akuza hosi prokuradór nu'udar ofensa integridade fízika simples tuir artigu 145 Kódigu Penál.

Relatóriu ne'e konklui katak akuzasaun ba kazu violénsia doméstika dala barak la releta natureza no gravidade husi krime violénsia doméstika.

“Relatóriu ne'e apresenta ba públiku ho espetativa atu kontinua kontribui perspetiva ba diskusaun públiku iha autóres sira iha setór justisa, akademiku no estudante sira, relasiona ho oinsa asegura interpretaun no implemensaun ne'ebé apropiadu ba provizaun sira iha Lei Kontra Violénsia Doméstika no Kódigu Penál,” dehan Diretór Ezekutivu JSMP, Luis de Oliveira Sampaio.

Relatóriu ne'e konstitui faktu sira ne'ebé JSMP observa durante tinan tolu nia laran, no perspetiva no analiza JSMP nian ba kada provizaun sira ne'ebé aplika iha kada kazu violénsia doméstika, no rekomendasaun ba Ministériu Públiku, tribunál, no instituisaun relevante sira.

“JSMP haksolok hodi hare katak iha esforsu no komitmentu ne’ebé boot tebes husi autór judisiáriu sira, maibe JSMP kontinua enkoraza iha diskusaun nakloke ba kada artigu no provisaun sira ne’e hodi asegura katak Lei Kontra Violénsia Doméstika iha nia papel atu reduz no kombate violénsia doméstika iha Timor Leste”, dehan Direktór Ezekutivu JSMP, Luis de Oliveira Sampaio.

Partisipantes sira ne’ebé marka prezensa iha eventu ne’e mai husi instituisaun relevante sira hanesan autóres judisiáriu, ONG ne’ebé servisu ba vítima fetu, Governu hanesan SEPI, Parlamentu Nasionál, PNTL, F-FDTL, Universidade, ajensia internasionais nomos nasionais no mídia.

Aproveita oportunidade ne’e, JSMP hakarak hatoo ami nia agradesementu ba doador sira ne’ebé kontribui ba publikasaun relatóriu ne’e hanesan Justice Support Facility, Norwegian Embassy Jakarta, UNICEF, UNDEF, Finland Embassy Jakarta no doadores sira seluk ne’ebé finansia projeitu monitorizasaun JSMP iha tinan tolu liu ba kotuk, The Asia Foundation no Miserior.

JSMP hein ho laran metin atu hetan ka simu komentáriu ka observasaun ruma relasiona ho relatóriu ne’e. Relatóriu ne’e disponivel iha lian Tetun no Inglês. Ita boot sira bele asesu mos relatóriu refere iha: www.jsmp.tl

Relatóriu ne’e produz no publika liu husi apoiu finansieru husi Justice Support Facility no Royal Norwegian Embassy Jakarta.

Atu hetan informasaun kompleitu, favor kontaktu:

Luis de Oliveira Sampaio

Diretór Ezekutivu JSMP

Diresaun e-mail: luis@jsmp.minihub.org

info@jsmp.minihub.org

Telefone:3323883 | 77295795

Website: www.jsmp.tl

Face book: www.facebook.com/timorleste.jsmp

Twitter: @JSMPTl